

## 2 Korint

<sup>1</sup> Njai Pol, njai Jesus Kristus san aposel, Anut ilon yen dan ago, id teid Timoti njai da girek en migire ya. Mañ girek en añ Anut san midaeñ Korint na amado dan, agod tamolpein fidian a Anut idiraig gun dilasa yan Akaia provins ilon lo dumado dan dam, sam na girek en migane ipalu da.

<sup>2</sup> Anut a idsad Tamad an, inñ Jesus Kristus idsad Tubun en da inñaned ilo panek maror da añ ka dupanañ a.

### *Muruan saen lo Anut ilo maror ipanama da*

<sup>3-4</sup> Mañ Anut, Jesus Kristus mañjanema Tubun en Taman per mupani wa. Man ata wo, inñ gidad mañsama madai funfun an lo ilo maror ipanama da. Inñ ilo muñjanek fidian san Taman, agod inñ maror fidian san Anut, an niñen o mañ muruan fidian mukubiani dan lo maror ipanama da. Nek fun amaiak niñen o ilo maror a mañ Anut lo miñane amaiak niñen o, tamolpein a madai naok funfun disini dan ilo maror naon kisaek an mupidinai o mañ idaisuda ya.

<sup>5</sup> Man dugo, nek ibol mañ Kristus da sisem inñsan madai tubun mi misini dan, nek ago mi mañ inñ da sisem inñsan ilo maror tubun mi miñane da.

<sup>6</sup> Tamolpein mañ ru añ lo mufulale dop an lo muruan dupanama tap, an ilasa san fun man, Anut ilo maror inñ patun pasek da añ ipanañ a. Agod Anut mañ dam ilo maror ipanama tap, nek ago mi mel an ilo maror añ dam ipanañ a. Saen

an madai a man misini dan ago mi asini dop an lo atur sakar dan lo, ilo maror amaiak ale wa.

<sup>7</sup> Man ago agane wo iloma yen da, agod mansama kankan mel an san an lo dabai anda yen da. Man dugo, man malon ak nek ibol an man da sisem madai funfun tukubiani dak, nek ago mi ilo maror dam an man da sisem tukubiani wa.

<sup>8</sup> Teig taog, an mel en ninen anjon o man man iloma ta ibol na da. Saen man Esia provins lo mumado dugo muruan tubun mi misini se ya. Man mukubiani ak ibol dibilama tan na madug duparfufaramag matur dabai san tia yak igo ya. An lo man iloma lo gamu en mamat dak ago mabol a.

<sup>9</sup> Rumok, man iloma lo ibol tamol kot lo itur go mater ile wo dubol ak igo ya. Kagin an ilasa yan fun man, mansema wagama lo ta matur na wa, tia, Anut nek a talpein dumat ak ifufunaip dumasa den mi tinima mupani wa.

<sup>10</sup> In mater saian geig ak sumeik mile wo dugo ipasama injilama ya, agod in nek ago mi igane yau a. Man dugo, man in pempem patuma ipasi wo tinima in mi mupani da.

<sup>11</sup> An ninen an dam ansam gudanek lo man abinawama wa. An wei mi ansam gudanek an Anut ilon dop an lo man ibinawama wa. Ago dop tamolpein wei mi binawek uyanan Anut ipanama yan ninen o ilo uyan dupani wa.

*Pol ilon san ilo girek ibileksa yak san fun*

<sup>12</sup> Man malak malak ru en ka murupaian a. Man tan en lo, agod an malam lo dam kagin uyan ak mi migane na ya. Mansama ru man rumok ago mi mansama kagin naok naok dam gun a, man dugo,

Anut kagin mi muri mupani se ya. Mañ tan en san mañau uyan uyan ak lo urat ta migane na ya, tia, mañ nek Anut sinan mañau a ipanama yan lo mi urat migane se ya.

<sup>13-14</sup> Girek e migireg anñsam na migane ipalu den ta imianuk na ya. Tia, girek an an asutip kuai tem ka alon uyan a. An gamu mañ ta alon uyan na ya, gug murna dop an mañ alon uyan ak ago iloma ibol da. Ago dop saen Jesus idsad Tubun en imul ipalu wan ante dop an mañ yanama abisa wa, nek ibol mañ dam an yanam mabisa wak ago ya.

<sup>15-16</sup> Nai an niñemi wo ilog lo rumok ak an mañ alon uyan pe ananem tini ganei mañ lo agane wan niñen o, nai ilog igo yen a. Nai anñsam na nupalu gup murna Masedonia na nau a, agod fon Masedonia niñiseip anñsam na nupalu da wa. Ago dop man mañ an da saen uraru tumado wan niñen ilom uyan dop nai adinag pe Judea na nau a.

<sup>17</sup> Dugo, saen nai ilog ago yen dan lo, nai baleg uraru i? Tia, ibol tan en san tamolpein ilo sou digane dan ago, in awok dubol gup fon tia dubol dan ago ilo girek niñane di? Tia geig a.

<sup>18</sup> An Anut inñinanen ru iganuri dak ago alon tap, an ru e murupaian den ru rumok an dam alon a. Mañ “awok” in “tia” da sisem ta mabol na wa. Mañ tamol naok ago yak tia ya.

<sup>19</sup> Nai Sailas da, agod Timoti dam, mañ an naom na Anut Nanun Jesus Kristus niñen o mabol ilasa ya. Ak dugo, Jesus Kristus inñen nek ibol tan en san tamolpein igo won balen uraru lo ru ibol i? In tamol balen uraru san tia ya, tia, in saen fidian mel uyan ak niñen o mi awok ibol da.

<sup>20</sup> Man dugo, Anut san awak aban a ipanad an

fidian Jesus Kristus lo nuñon dufug fidian idaisuda ya. An fidian niñedi wo Jesus “Awo” ibol da. Fun amaiak niñen o saen id Anut tugudani dop Jesus yañan lo “Rumok” tabol da. Agod kagin an lo id Anut yañan tabisa da.

<sup>21</sup> Gug Anut inñsen mi Kristus lo añ mañ da sisem itumanad go ilo rumok lo kisaek tilasa ya. Agod inñ id ipilianad a.

<sup>22</sup> Inñsan Ur id ilod lo igane ya. Kulob naok en lo id inñsan mok ago kob ipanad a. Fun an niñen o saen inñsan Ur id lo yen dan talon uyan dop man, id talon ak id inñsan mok a.

<sup>23</sup> Aria, ñai Anut ñuwagin dop ñaisag ru en ilon pe isatuanag a. Ñai Korint na ta ñupalu na yan san fun igo. Ñai anñsam naok naok aenta ñile yak ta itaot na ya, an niñen saen ante ñupalup añ muruan ñupanañ man ñamoi a.

<sup>24</sup> Mañ gurman igo milasap anñsam ilo rumok mititiani wo man mamoi a. Tia, mañ añ da sisem urat tigane dop an lo anñsam yousai ilom lo awan isa wa. Añ Jesus ilom lo rumok an lo atur sakar o iloma ago ibol da.

## 2

<sup>1</sup> Ak man ñai ilo sou igo ñigane ya, ñai fon anñsam na ñupalup an lo madai ñupanañ o man ñamoi a.

<sup>2</sup> Ñai ilo uyan lo mi anñsam na ñupalu wo ilog ibol da. Ak ñai ilo saiak ñupanañ tap, ante talpein ta ñai ilo uyan ipanag san tia ya.

<sup>3</sup> Ñaisag girek imug mi ñigire yan lo, añ anañem madok akubune wo ago ñigire ya. Fun man saen ñai anñsam na ñupalu wan lo, tamolpein a ñai ilo uyan dupanag o ilog ibol dan inñ ñai ilo muruan an

fon ta dupanag na wa. An ninjen o naji ilo sou igo njigane ya. Anj anjanem madok akubunep itaot dop man, an naji da sisem ilo uyan lo mi tumado wa. Agod naji nalonj ak anj naisag ilo sou aganuri wa.

<sup>4</sup> Naji anj ninjemi wo ilog muruan ak, ilog saian go malag turon idu dugo girek imug an njigire ya. An san fun man naisag girek an lo anj muruan njupananj o ta njigire na ya. Tia, naisag ilo munjanek anj lo yen dan alonj uyan o ago njigane ya.

*Pol midaenj aupasek adi ilod dupidinai o ibol a*

<sup>5</sup> Dugo, ta anj lulunjam lo imug mi muruan naji ipanag ak i? Rumok a, ago gug naji o mi tia ya, tia, o kabel, naji ago njurupaianj da, inj midaenj fidian o ilo muruan ipananj a.

<sup>6</sup> Anj talpein an muruan apani yau o ta agane na wa, man dugo, midaenj inj muruan dupani la yan idaisuda ya.

<sup>7</sup> An ninjen o injsan aupasek anj apare idu dop lo ilon pasa ibol a. Kabelan ilo muruan tubun kasik lo ilon idu yaup malan isue saian geig banau.

<sup>8</sup> An ninjen anj igo agane wo njurupaianj da, anj fon ilom apani mok a.

<sup>9</sup> Man dugo, naji anj njukubiananj go njilianj a, anj mel fidian lo naji awag aganuri boi, tia boi, ago nalonj a. Naji girek a imug mi njigire yan san fun ago ya.

<sup>10</sup> Talpein a injsan aupasek apare idu yan, naji dam injsan muruan njupare idu wa. Agod muruan ta njupare idu na yak tap man, an Kristus naon na anj njibinawanj san o ago njigane ya.

<sup>11</sup> Ago dop lo naji Satan naon dal njufou wa, kabelan inj dal ta kuai ipanip lo id irawad dop talpein

an tipitiņini banau. Man dugo, id inřsan ilo sou saiak mianuk an taloņ fufei a.

### *Kontrak foun ak san urat tamol adi*

<sup>12</sup> Saen řai Troas na Kristus san bilaluņ řufulale wo řupalu yan, atna Tubun ak inřsan bilaluņ ifurak pe yau san niņen dalawan ipasi panag dugo řile ya.

<sup>13</sup> Ak man řai ilo maror amag tia ya. Man dugo, řai id teid Taitus niņen o abanjan řabi ak man atna ta řile na ya. An niņen o řai Troas tamolpein an řubisawaig Masedonia tan lo řau a.

<sup>14</sup> Maņ Anut yanjan mabisa wa. Man dugo, pem-pem mi inř Kristus lo imug yau da, agod maņsama ager fidian ibiai dudu yan niņen o maņ yousai lo muri mupani da. Anut tamolpein maņ lo ip-iteņanai dan lo, inřsad maņau Kristus niņen o ama-iaak ibol mumalun siņaokan ta bulbal ak igo woņ igane ifurak pe gidigheid yau da.

<sup>15</sup> Man dugo, gidad maņ tamolpein a Anut patud ipasi dan luluņad lo matur boi, tia, ensauta a daoņ lo diau dan luluņad lo matur boi, Anut maņ mumaluma iwen iloņ a, man dugo, maņsama mumaluma man nek ibol Kristus mumalun igo woņ a.

<sup>16</sup> Tamolpein a daoņ lo diau dan maņ mumaluma man ibol tamol imat la yak mumalun igo woņ ago dubol da. Warou an mateņ lo dudu diau a. Gug ensauta a patu pasek diņane dan maņ mumaluma nek ibol mel kumaen mok ak san mumalun igo woņ ago dubol da. Warou an kumaen yen yau san an diņane wa. Enti inř urat naok ago yak igane san idaisuda i?

<sup>17</sup> Mañ man tamol aenta Anut san ru dufulale dop lo moni diñane wo digane dan ago tia ya. Ilo sou mianuk ago yak mañ lo tia ya. Tia, mañ tamol nuñon igo woñ, Anut malan lo inñsan ru mabol ilasa da. Urat an Kristus lo migane wo Anut ipilianama ya.

### 3

#### *Aposel adi man kontrak foun ak san urat tamol*

<sup>1</sup> Dugo, afon mañ fun miganeg sema yañama mabisa wo migane di? Dugo, mañ ta idaisuda na yak i? Ago yak niñen o añ girek ta mañ Anut san urat tamol mok ago ibol dan apanama wo iloma ibol di? Tia, dag talpein sen ak girek naok ago yak ta dupanañ o iloma ibol di?

<sup>2</sup> Tia, añsem mi man, mañanema girek ta kuai tem ibol da, an lo tamolpein añ diliañ dop duloñ ak mañ Anut san urat tamol mok a. Man dugu, girek an añ bubem ilon lo Kristus igire idu la ya, an lo tamolpein fidian dusuti dop añanem nao lalek dile duloñ a.

<sup>3</sup> Aria, añanem kagin naok naok an tamolpein ikubiai dile ya, añ Kristus san girek igane ipalu yak igo ya. An gau nam igire yak igo tia ya, tia, an Anut a kumaen imado dan san Awan Urgun nam igire ya. Pat fo na ta igire na ya, tia, an añ ilom lo igire idu ya.

<sup>4</sup> Mañ Kristus tinin log Anut tinima mupani da, an lo kagin an añ lo ago ilasa wa. Añ ago amado san iloma dabai a.

<sup>5</sup> Mañsema man ta idaisuda na ya, agod mel ta mañ tamol sama dabai lo migane ilasa yak ago ta mabol na da. Tia, Anut sen dabai ipanama yan lo

ago ka migane wa. Fun amaiak niñen o mi man idaisuda ya.

<sup>6</sup> Inñsen man ipilianama go inñsan urat tamol igo milasag, kontrak foun amaiak san urat migane da. Kontrak wagam an pepa roun fo digire ya. Ak gug kontrak foun an pepa roun fo ta digire idu na ya. Tia, an man Urgan san urat a. Kubiaen a digire yan man inñ tamolpein ifu dumat da. Gug Urgan man inñ tamolpein kumaen ipidinai da.

<sup>7</sup> Saen Anut kubiaen Moses ipani man pat fo igire gug ipani a. Kulob an girager tubun ak da ipalu yan lo, girager an san lilaman, rurek san, an Moses naon fo na yen a. Lilaman an niñen o, gidad an kute ibol dak ago bo man, Isrel adi Moses naon dile san dumoi. Aria, kubiaen man girager da ipalu bo man, kubiaen an tamolpein ifu dumat na ya. Kubiaen san saen inñ man tamolpein dumat ak san saen mi a.

<sup>8</sup> Gug Awan Urgan ipalu la ya, amaiak niñen o gamu en man Urgan san saen a, an lo kontrak foun ak san girager an lak na geig yau a. An niñen o an dugo ilom isou di? Dugo, kontrak wagam ak a tamolpein ifu dumat ak inñsan girager an kontrak foun ak san girager irinani i? Man tia geig a.

<sup>9</sup> Man dugo, kontrak wagam an tamolpein idiraig dideg diau a. Ago bo man inñsan saen lo girager tubun yen na ya. Amaiak niñen o kagin itaot ak san saen e gamu yen den lo, nal en san girager amaiak nal imug ak san girager irinani a, agod lak na geig yau a.

<sup>10</sup> An niñen o id tile yak, kontrak wagam ak girager aman da ya, ago gug gamu inñsan girager an yau itout manon a. Man ata wo? Kontrak foun



ak san girager tubun geig an lo kontrak wagam an imiani da.

<sup>11</sup> Man dugo, mel a kute ibol go itout yau amaiak girager da ipalu ya. An rumok tap, mel a pempem mi yen yau an, inſan girager man tubun kasik a.

<sup>12</sup> Amaiak niſen o kontrak foun ak san girager pempem san niſen o mala nouk tumado da, an niſen o maſ tamolpein malad lo matur dop ru mufulale wo ta marer na da.

<sup>13</sup> Maſ Moses igo tia ya. Tia, inſ yamel naon ibuluwig an lo dop Isrel tamolpein inſ naon fo girager a kute ibol dan ta duloſ na wa.

<sup>14</sup> Yamel an man Isrel tamolpein sad mitilaen igo ya. Gubak mi man Isrel ilod pat igo ya, an niſen o Anut san ru diſane wo dumoi a. Agod inſ gubak mi igom gamu dam naod kisaek mi a. Saen inſ kontrak wagam an san ru dusuti tap, yamel naon kisaek an nam duloſ san kankan ibalfutani da. Inſ gamugo yamel an dupasi a. Man dugo, saen inſ Kristus diſane dop yamel an Kristus ipasi yau a.

<sup>15</sup> Awo, wagam mi agog ipalug gamu en, saen inſ Moses san kubiaenſ dusuti dop man yamel ta tareſ igo woſ inſad uloſ an ibalfutani da, an lo ata mel rumok an duloſ san tia ya.

<sup>16</sup> Ak man saen talpein ibileksap Tubun en san na yau dop man, Tubun en yamel an ipasi yaup lo talpein an abanſ ile wo uyanan a.

<sup>17</sup> Aria, Tubun en inſ Ur, agod aben a Tubun en san Ur yen dan te man inſan tamolpein bigabeg urat tia kawan dumado da.

<sup>18</sup> Agod id ensauta a yamel malad ta ibalfutani na dan, id tig igo woſ Tubun en san girager id naod kapen fo yan isapudade dugo imul yau da.

Ago dop girager ta san na tupalu dop girager subunan taidam san na tau da, nek ago Tubun en idirad pe tibileksa yau on da, an lo inſen igo mi ago tilasa wa. Man dugo, kulob en man Tubun ak enti a Ur an, inſan nag ipalu ya.

## 4

### *Melmel sinjaokan geig ak bod saiak lo dien da*

<sup>1</sup> Amaiak niſen o maſ urat e Anut san ilo muſanek lo mabi den niſen o, iloma ta idu na da.

<sup>2</sup> Maſ kagin naok naok miai san an fidian gigin na midiri a. Maſ raek kagin lo ta mator na da. Anut san ru dam mukubuli wo mamoi da. Tia, maſ Anut malan lo tamolpein naod na ru rumok ak mi mabol ilasa da. Ago dop lo tamolpein fidian in maſ tamol naok dugo yak niſema wo ilo sou digane dop an lo dilep Kristus san urat an itaot mi migane da.

<sup>3</sup> Gug maſsama bilaluſ imianuk tap, an tamolpein a dideg diau dan inſad ilo sou lo mi imianuk a.

<sup>4</sup> Tamolpein an tan en san tubud Satan, inſad ilo sou yabi idu yan lo, tamol malad itau igo won dilasa ya. An niſen o lilaman inſad na ipalu dan dile san tia ya. Lilaman an man Kristus san girager, an bilaluſ uyanan ak ilon lo yen da. Agod Kristus man naon Anut naon igo ya, ago gug an dile san tia ya.

<sup>5</sup> Maſsama niſema wo ru ta mabol na da, tia, maſ Jesus Kristus niſen o mi mabol ilasa da. Agod bilaluſ e mufulale den man, Jesus Kristus inſen mi idsad Tubun a. Agod Jesus niſen o maſ man aſanem urat tamol adi, nek an mi a.

<sup>6</sup> Wagam Anut igo ibol, “Tidom tubun ilon lo lilaman ta ided a.” Anut nek amaiak mi maŋ bubema ilon lo lilaman iganeg ided da. Lilaman an man, maŋ Anut san girager niŋen maŋau am da ya. Agod girager an san lilaman Kristus sen naon fo na ided dugo mile ya.

<sup>7</sup> Rumok, filian siŋaokan amaiak maŋ mabi da, ak man iŋ bod saiak ilon lo yen da. An Anut san ilo girek, an lo dop iŋ maŋ ikubiai panamap, dabai a tubun kasik an iŋsan mi, maŋsama tia wa.

<sup>8</sup> Muruan naok sensen dupanama da, gug ta duparfufarama na da. Mel saian wei mi marer san mile da, gug iloma ta idu na da.

<sup>9</sup> Maŋsama ager dukudama da, gug Tubun en ta ibisawama na da. Maŋ dufunama dibilama madu da, gug ta dipitiŋinama na da.

<sup>10</sup> Maŋ saen fidian Jesus san mateŋ an tinima lo misini mator da, ago dop man iŋsan kumaen an maŋ tinima lo tamolpein kuai tem dile wa.

<sup>11</sup> Man dugo, saen fidian maŋsama tureŋ lo Jesus niŋen o mateŋ lo madu mau o dibilama se ya, an lo dop iŋsan kumaen an maŋ tinima tan en san lo kuai isi wa.

<sup>12</sup> Amaiak niŋen o, mateŋ maŋ lo urat igane dak, gug kumaen man aŋ lo urat igane da.

<sup>13</sup> Tamol ta Isrel sad bar lo igo ibol, “Ŋai ilog lo rumok a. Amaiak niŋen o ŋai ru ŋabol ilasa ya.” Tamol a ŋutun lo ilo rumok yen dan ago mi maŋ dam iloma lo rumok an lo ru mabol ilasa ya.

<sup>14</sup> Maŋ malon ak Anut a iŋ Jesus Tubun en ifufuni yabisag kumaen ipani an, iŋsen mi maŋ dam ibiamasap, Jesus da sisem iŋiliamap, aŋ da

sisem kumaen panu na tiladu dop, Anut naon na tatur a.

<sup>15</sup> Amaiak niñen o muruan a fidian misini dan man añ ibinawañ o misini da. Agod saen Anut san ilo panek ifufurak yau dop tamolpein wei mi ilo panek an diñanep per dupani dop lo inñsan girager lak na geig isuda yau a.

*Aposel sad tinid man dabai itout, gug tinid ilon lo dabai foun ak diñane ya*

<sup>16</sup> Fun an niñen mañ iloma ta idu na da. Gidad mañ tinima tan san en dabai itout ak, gug tinima ñutun san man nal kisaek kisaek atem dabai foun ak inñane ipalu da.

<sup>17</sup> Man dugo, muruan e saen katukan mi yen san ak misini den man, girager tubun kasik bageu san ikubune panama da. Girager an pempem mi yen a, agod inñanen tubun an tou mupani san mañ ta idaisuda na wa. An niñen o muruan gamu misini den an mel kawan mok a.

<sup>18</sup> Man ata wo? Mañ melmel a kuai isi la yak meil o malama ta yau na da. Tia, melmel a meil san tia yan amaiak niñedi wo mi iloma isou da. Man dugo, melmel e meil den man saen katukan mi dien a, ak gug melmel a meil san tia yan man pempem mi dien a.

## 5

*Pol tinik foun ak san ru fañan an ipidinai a*

<sup>1</sup> Mañ malon ak tan en san ab gamu lo mumado den saian tap, mañ ab sen ta Anut san na yak ka miñane wa. Ab an tamol banin nam ta igane na ya, tia, ab an Anut sen ikubune panama ya, agod kumaen panu lo pempem yen yau a.

<sup>2</sup> Tan na maɲ tinaɲ lo mi mumado da, an niɲen maɲ tinima foun a kumaen panu lo yen dan miɲane wo yaes isofutanama da. An lo nek ibol kulos foun ak ituanama san igo woɲ, maɲsama tinik foun an miɲanep ilon lo mumado wo yaes ifunama da.

<sup>3</sup> Ago dop saen maɲ mamat dop maɲ ur tinin tia yak igo woɲ ta mator na wa. Tia, maɲ tinik foun ak kumaen panu san an mitabug pe lo mumado wa.

<sup>4</sup> Saen maɲ tan en san tinik lo mi mumado dop man, maɲ tinaɲ migane dop iloma isasau a. Ata wo maɲ ago migane di? Dugo, maɲ mamat pe ur tinin aman tia yak igo woɲ milasa wo iloma ibol di? Tia. Maɲ maɲsama tinik foun ak mitabug o iloma ibol da. Ago dop tan san tinik e imat san en itout yau dop lo, tinik a kumaen pempem san an, tan san en, aben iɲane wa.

<sup>5</sup> Mel e maɲ miɲane san man, Anut iɲsen mi kubunek lo idirama la ya. Agod iɲanen Ur an man, kumaen foun en san satuanek igo ya. Ur a ipanama yan lo maɲ rumok malon ak mel en ilasa wa.

<sup>6</sup> An niɲen saen fidian maɲ sema iloma musatumani da. Agod maɲ malon ak saen maɲ tinik en lo mumado den maɲ Tubun en san na asau mi mumado da.

<sup>7</sup> Man dugo, maɲ ilo rumok lo mi mator da. Maɲ mel mile malon ak lo ta mator na da.

<sup>8</sup> Nai ɲabol, maɲ sema iloma musatumani da, ago gug maɲsema gidad, tinima mibiseip Tubun en san panu na ida mumado tap man, an uyanan geig a.

<sup>9</sup> Kulob naok e maɲsama kob igo miganeɲ lo mau duman, maɲ Tubun ak ilo uyan mupani wa. Gidad

manj tan en lo mumado boi, tia, kumaen panu lo mumado bo man, manj inj ilo uyan mupani wa.

<sup>10</sup> Man dugo, id fidian mi Kristus naon na bitinaek lo tatur a, ago dop id anen anen atem tan na tumado dugo kagin uyan saian tigane na yan atem naon tinjane wa.

*Manj Anut san nao njanek tamolpein*

<sup>11</sup> Amaiak ninjen o manj manjsama rurek Kristus lo malonj uyanan an lo, tamolpein ilod minjane da. Anut manj dugo yan ilonj uyan a, agod njai ilog ibol dak anj dam bubem lo manj dugo yan anj alonj uyan a.

<sup>12</sup> Anj naom na fon sema kuai te idirama milasa wo ago ta migane na da, tia, anj manjsama yanjama asini san fun alonj o ru en mabol da. An lo man, anj ka tamol a insigned yanjad ninjen o mi ilod isou dugo injaned ilodi ninjen o ilo sou ta digane na dan, ru naon uyan ak apidinai a.

<sup>13</sup> Ak dugo, manj njinenj burau ak ta minjinenj tap, an Anut o ago migane ya. Gug njinenj itaot ak minjinenj tap, an ibinawanj san a.

<sup>14</sup> Man dugo, Kristus san ilo panek amaiak manj ititianama da. Manjsama ilo rumok man mel en rumok a, tamol kisaek mi tamolpein fidian sad abed injane wo imat a. Ago yan ninjen o tamolpein fidian sad madok wagam an lo dumat a.

<sup>15</sup> Ago dop tamolpein ensauta a kumaen dumado dan fon sed ninjedi wo ta dutor na wa, tia, inj Kristus a inj waged lo imat go fon kumaen imasa amaiak o mi dutor a.

<sup>16</sup> An ninjen o gamu saen e yau den, manj tamolpein tan en san ilo sou lo ago ta meil na da. Rumok, manj imug mi Kristus tan en san tamol igo

woŋ mile ya, ak man gamu man fon ago ta migane na da.

<sup>17</sup> Fun an niŋen o talpein ta Kristus lo imado dak ago tap, Anut inŋ talpein an iganeg foun ilasa ya. Kagin a wagam inŋsan madok imug ak san an fidian ibisei a. Rumok nuŋon, inŋsan kagin wagam ak ibisei yau itout go inŋ foun ilasa ya.

<sup>18</sup> Kulob an fidian sad fun man Anut mi a. Inŋsen mi Kristus lo inŋsan turan muroun idirad a. Agod Anut inŋsen maŋ tamolpein maŋal dop inŋanen turan muroun midirai san urat migane wan, maŋ ban-ima lo igane ya.

<sup>19</sup> Nai igo ŋabol, Kristus lo Anut inŋ tamolpein a tan titin fidian lo dumado dan, inŋsan turan muroun idirai san niŋen o urat igane ya. Agod saen ago igane yan, inŋsad aupasek fidian gigin na idiri dugo an niŋen ilon ta isou na ya. Agod inŋ bilaluŋ e id ka Anut turan muroun tilasa san en maŋ ipanama ya, ago dop maŋ awama lo an mabol ilasa wa.

<sup>20</sup> An niŋen o maŋ Kristus wagen lo inŋsan nao ŋanek tamol igo woŋ mumado da. Maŋ awama lo Anut tamolpein ilod inŋane wo ru ibol da. Amaiak niŋen o maŋ Kristus wagen lo mududuwanŋ dop, aŋ Anut da nug turan mok alasa wa.

<sup>21</sup> Kristus inŋsen aupasek ta igane na yak bo man, Anut id abed lo iganeg inŋ aupasek tamol igo woŋ ilasa ya. Ago dop id Kristus da tutumani an lo Anut san kagin itaot mok an id ŋutud lo ilasa wa.

## 6

<sup>1</sup> Amaiak niŋen o, maŋ Anut da sisem urat migane dan niŋen o igo mududuwanŋ da, aŋ Anut san

ilo panek an mel kawan igo won ta anjane na wa.

<sup>2</sup> Man dugo, Anut igo ibol,

“Saen a uyanan an lo naj onj awa njalonj a,

agod patu pasek san nal lo onj njibinawo ya.”

Alonj uyan, nal e gamu yen den man saen uyanan a, agod patu pasek san nal an man gamu en mi a.

### *Muruan funfun Pol isini se ya*

<sup>3</sup> Manj talpein ta san dal mufou dop njien isuep yau idu man mamoi a, an lo aenta manjsama urat ta dile saian na wa.

<sup>4</sup> Tia, manj Anut san urat tamol mok an mi dal funfun en igo mukubiaig dile ya. Muruan lo iloma ta isali na yan lo, madai lo, tinima san melmel ninen katuk ama yan lo, iloma irer dan lo, bu dupanama dan lo,

<sup>5</sup> subanek lo, abanj daonj digane san saen lo dufutanamag dububujanama yan lo, urat wagai lo, tawanj miganeg mumado yan lo, ananj o geg migane yan lo,

<sup>6</sup> kagin ikokan lo, manjau lo, mos kagin lo, ilo munjanek lo, Awan Urgun lo, ilo panek mok ak lo,

<sup>7</sup> ru rumok ak lo, Anut san dabai lo, kagin itaotan ibol wagai san mel banima won ak lo, nas ak lo dam, manj Anut san urat tamol mok an kuai tem mukubiaig dile se ya.

<sup>8</sup> Manj dipitianama dak, dibiama madu da. Manj yanjama diabisa dak, manj yanjama dipitijini da. Manj sewak tamol ago dubol da, ago gug man manj tamol nunjon mi a.

<sup>9</sup> Manj ta dulonj na dak ago dubol da, ago gug manj dulonj uyanan da. Manj mamat manonj a, ago gug



kumaen mumado yau oŋ da. Maŋ bu dupanama da, ago gug ta mamat na da.

<sup>10</sup> Maŋ iloma ipapao da, ago gug pempem yousai lo mi mumado da. Maŋ filiama tia ya, ago gug man tamolpein wei mi midirai filian tamol dilasa da. Maŋ mel amama tia ya, ago gug mel fidian maŋsama mi a.

<sup>11</sup> O Korint tamolpein, maŋ bubema awan mu-pasi panar go ru kuai tem murupaian da.

<sup>12</sup> Maŋsama ilo panek ar o yen dan ta mabitواني na da. Tia, arsem mi arsam ilomi maŋ niŋem o an abituani da.

<sup>13</sup> An niŋen o ŋai nek ibol tamol ta gamu nanuk irupidai dak igu woŋ igu ŋabol da, ar bubem awan apasip maŋ niŋema wo dam amat a.

### *Anut san ubou ab*

<sup>14</sup> Ar tamolpein ilo rumok tia yan dida ta atu-manip, urat agane na wa. En dugo, kagin uyan ak saian ak da sisem nug ka diganuri wak i? En dugo woŋ pe tidom in adian da ka dutumanip nug turan igu woŋ dutor ak i?

<sup>15</sup> En dugo woŋ pe Kristus in Satan da ka dutu-mani wak i? En dugo woŋ pe tamol ilon lo rumok ak in tamol ilon lo ta rumok na yak da awad kisaek ak i?

<sup>16</sup> En dugo woŋ pe Anut san ubou ab in ai pat sad mitilaedi da sisem ka dutumani wak i? Man dugo, id man Anut a kumaen imado dan san ubou ab. Anut sen igu ibol,

“Ŋai in dadi mumado wak, in lulunad lo ŋator a.

Ŋai man in sad Anut, agod in man ŋaisag tamolpein.”

- 17 “An niñen o aņ tamolpein ilod rumok tia yan abisawaip sen alasa dop asau mi amado wa. Tubun en ago ibol a. Mel nun anda yak ta abi na wa, ago dop lo ņai ņiņilian pe ilog ņupanaņ a.
- 18 Ⱥai aņanem Tamam ņumado dop aņ ņaineņ nanug pein, nanug muroug amado wa. Tubun en in Dabai Geig ak ago ibol a.”

## 7

<sup>1</sup> O ņai bubeg mok, id Anut san awak aban a tiņane la yan niñen o, id tinid lo, ņtud lo, mel a iganep nun tilasa dan tusuas yau a. Ago dop idsad rurek Anut lo yan idirad pe idsad kagin gun ak itaotan ilasa wa.

*Korint tamolpein ilod ibileksa yan niñen o Pol uyan isusa ya*

<sup>2</sup> Aņ maņ niņema wo bubem awan apasi wa. Maņ talpein ta saian mupani man tia yak, maņ talpein ta malan musue man tia yak, maņ talpein ta mirawip inșan mel magam man dam tia ya.

<sup>3</sup> Ⱥai ru ago ņabol an lo, aņ ta saian ņupanaņ na da. Tia, ņai gubak mi aņ man maņsama bubema buson ago ņabol la ya. Gidad maņ aņ da sisem tamat boi, tia, aņ da sisem kumaen tumado bo man, maņ aņ niņemi wo tubun mi mamat yau oņ da.

<sup>4</sup> Ⱥai aņ niņem o ilog tubun mi rumok da, aenta naod na ņupitianaņ na ya, ņai ilog aņ niņemi wo tubun mi ipasti da. Ⱥai madai fidian lo aņ niņemi wo yousai ilog lo inañefute da.

<sup>5</sup> Saen manj Masedonia na mupalu yan, mansama tinima en yaes ta ibal na ya. Aben fidian lo muruan ilasa se ya, tinima patun fo yak wagai mile se yak, agod tinima ilon lo yak rurek tubun mi yen se ya.

<sup>6</sup> Ak man Anut a tamolpein ilod idu yak dabai ipidinai dan, inj Taitus iganeg ipalu yan lo manj bubema dabai ipani a.

<sup>7</sup> An man Taitus ipalu dak lo mi tia ya, tia, anj imug Taitus ilo maror apani an lo, inj anj ninemi wo ilon ipasti a. Inj ibol ak anj naj aliag o ilom ibol da. Anjanem ilo tinan, anjanem ilo panek naj o dam ninen ibol dugo najon a. An ninen o anjam kagin an lo naj ilog tubun mok uyanan a.

<sup>8</sup> Gidad najisag girek njigire yan ilo muruan ipananj ak, gug naj an ninen ilog ta saian na da. Rumok, naj imug ilog saian a, gug gamu man tia ya. Man ata wo? Naj kuai te njile yak najisag girek an anj ilo papao ipananj a, gug man an saen katukan san mi a.

<sup>9</sup> Ak man gamu naj ilog uyan da, naj anj ilo papao njupananj ak o ilog ta uyan na da, tia, an fun man anj ibinawanj pe ilom abileksa wa. Anut sen ilo papao en anj lo ago igane ilasa ya, an lo manj anj mel ta lo mala suek mupananj man tia ya.

<sup>10</sup> Man dugo, ilo papao a Anut talpein ta ilon lo igane ilasa dan lo talpein an iduduwip ilon ibileksa wa. Agod an man ilo muruan tia ya. Ak gug ilo papao a tan en san an tamol ta ibinawi na da, tia, inj dal saiak lo itor yaup materj ile wa.

<sup>11</sup> Man dugo, anj ale uyanan a, ilo papao e Anut anj lo igane ilasa yen man kagin naok dugo yak anjanem madok lo iganeg ilasa ya. Anj kagin

uyanan lo atur ak, an yanami akubune wo ilom yen dan, ru dabai lo an “ago tia yak” abol dan, ilo urer ipanan dan, man o yaes isofutanan dan, kagin uyan ak dabai lo agane dan, an ansem bu ipanan da. An dal fidian lo man akubiai panama yan lo man, kagin naok naok a agane yan man uyanan mi a.

<sup>12</sup> An ninen o gidad naji girek a imug njigireg njigane ipalu yan man, talpein a saian igane yan ninen o ta njigire na ya, tia, talpein ta a muruan ile yan ninen o dam tia ya. Tia, girek njigire yan lo Anut malan lo anjanem kagin uyan ak man njinema wo dabai lo agane dan kuai te ilasa dop ale wa.

<sup>13</sup> Amaiak ninen o anjam kagin uyanan an lo man ilo maror apanama ya.

Man mi ilo maror lo ta mumado na ya, tia, saen Taitus san yousai mile yan man sama yousai lak na mok yau a. Man dugo, an insan ilo muruan a imug yen an ninen o aganeg ilon pasauman.

<sup>14</sup> Man dugo, Taitus gamugo ilian dugo naji in naon na njupitiana a, an lo an anjanem kagin lo miai ta apanag na ya. Mel fidian a murupaian an man ru rumok a, nek ago mi man sama se pitiano ru an njinema wo Taitus naon na mabol an dam rumok a.

<sup>15</sup> Taida mi, saen in anjanem awa bek kagin agod arut arer san kagin lo in anane yan ninen ilon isou da, an o tubun mi imat da.

<sup>16</sup> Naj yousai lo njumado da, man dugo, an naji awag ari apani an njalon fufe a.

## 8

*Korint adi Kris Judea na yan moni lo dubunawai a*

<sup>1</sup> Teig taog, maŋ aŋ dal dugo lo Anut san ilo panek an Masedonia midaeŋ luluŋad lo kuai isi ak aloŋ o iloma ibol da.

<sup>2</sup> Man dugo, iŋ muruan tubun geig ak lo diladu yan man bubed ibitinae a. Iŋ bo filiad tia ya, ago gug iŋsad yousai bubed lo yan tubun geig go iŋ tamolpein aenta dibinawai o ilod yen a.

<sup>3</sup> Nai malag lo ŋile yak niŋen ŋurupaiaŋ da, iŋ iŋsed ilod nam moni sapta a urat aman tia yan dupani wo dutumani a. Agod moni nen isuk isuda geig dutumani a. Kulob an iŋsinad ilod ibol ak fo mi digane ya.

<sup>4</sup> Saen wei mi maŋ dalawan mupasi pidinai dop lo, iŋ Jerusalem san Kris tamolpein dibinawai san urat awan ka digane wo, ilo panek lo maŋ sumiaek dupanama ya.

<sup>5</sup> Maŋ iŋ niŋedi wo marut a, man dugo, iŋsinad ilo sou uyanan ak maŋsama iriŋani a. An lo malan malan iŋsed tinidi Tubun en dupani a, ago gug murna Anut ilon yen dan ate iri panim maŋ ban-ima lo dupalu ya.

<sup>6</sup> An niŋen o maŋ Taitus ru kagin igo murupe i a. Wagam iŋ ilo panek urat an aŋ luluŋam lo fun igane la yan niŋen o, gamu iŋ dam aŋ luluŋam lo ipalup urat awan an igane itout a.

<sup>7</sup> Aria, aŋ mel fidian lo aenta ariŋanai da, ilo rumok lo, ŋiŋeŋ lo, maŋau lo, kagin nuŋon ak lo, agod maŋ o amat dan lo dam mi a. Fun an niŋen o kagin aganep ilo panek urat en lo dam aŋ aenta ariŋanai a.

<sup>8</sup> Nai aŋ ago agane wo ru kagin ta ŋupanaŋ na da, tia, tamolpein aenta iŋ binawek naon kisaek dupani wo ilod yen da, an niŋen o ŋai aŋanem

ilo panek kagin an mel mok boi, tia yak boi, ago n̄ibitinae n̄ile da.

<sup>9</sup> Man dugo, an̄ Jesus Kristus idsad Tubun en san ilo panek kagin ale alon̄ la ya. In̄ bo filian tamol a, ago gug man in̄ an̄ nin̄em o filian tia yak ago ilasa ya. Ago dop in̄ filian tia yak nin̄en o man an̄ filian tamolpein alasa wa.

<sup>10</sup> Anan̄ar imug ante an̄ imug fun aganeg moni atumani a. An mi tia ya, tia, saen an lo dam kulob an agane wo an̄ ilom bubem fidian imasa ya. Aria, n̄aisag ru kagin nek igo ya, gamu en urat an agane itout a. An̄ ago agane tap, an̄ an̄ o nek uyanan a.

<sup>11</sup> An̄ imug mi urat en fun agane san nin̄en ilom tubun mi imasa ya. Amaiak nin̄en o an̄anem ilo masak imug ak iri panim, gamu nek ago mi maeg agane dop urat an agane itout a. Gidad an̄ filian tubun ak amam tia bo man, an̄sam filian a yen dan kabelan mi lo ka abinawai a.

<sup>12</sup> Man dugo, an̄ abinawai o tawan̄ agane tap, Anut malan lo uyanan a. Ak dugo, tamol ta in̄ ka filian a ta yabi na dan ate mel ta in̄anep ipidinai ak i? Man tia ya. Filian nek a yabi dan lo mi ibinawai o Anut uyan ipani wa.

<sup>13</sup> An̄ muruan tubun mi asini dop an lo tamolpein aenta an̄sam filian lo dumado uyan o n̄ai ago ta n̄abol na da.

<sup>14</sup> Tia, igo n̄abol da. Gamu saen en lo an̄ mel amam da ya, an nin̄en o an̄ teim taom katuk amadi an abinawai a. Ago dop man saen an̄ katuk amami dop in̄ naon dibinawan̄ a. An lo man dal naon kisaek mi id fidian o ka yen da.

<sup>15</sup> Ru e girek lo yen den igo ibol, “Talpein a anan̄ tubun mi itumani an anan̄ wadan ta yen man tia

ya, ago dugo talpein a anan kabelan itumani an in anan lo ta katukan na ya.”

*Pol tamol idinaig Korint na diau a*

<sup>16</sup> Nai Anut ilo uyan nupani da, man dugo, in sen Taitus ilon yabisa ya. Ago tag, nek ibol nai an ninemi wo ilo sou nigane dak igo won, ago mi in dam an ninemi wo ilo sou igane da.

<sup>17</sup> In an sam na ipalu da wo musumianig an uyan ibol a. Ak man in sen dam urat en igane wo ilon tubun mi yen a, an ninen in sen ilon ibol ago mi ipalup ilian a.

<sup>18</sup> Man id teid ta mipiliani ak in da dupalu wa. In man kaman tamol, ubou ab fidian lo Anut san ru uyanan ifulale fufei da, an ninen o yan an diabisa da.

<sup>19</sup> Agod an mi tia ya. Tia, in midaen fidian dipilianig man da moni a ilo panek lo dutumani dan minane mitiliani da. Urat migane dan lo Tubun en yan an mabisa da, agod man anema ilo munanek kagin tamolpein malad lo kuai te migane ilasa da.

<sup>20</sup> Man tamolpein binawek tubun mi digane yak banima lo yen da. Moni an kagin mupani uyanan ak ninen o talpein ta patuma fo uf igane man mamoi a. Fun amaiak ninen o man teima en miganeg Taitus ida dupalu wa.

<sup>21</sup> Man Tubun en malan lo kagin uyan ak mi migane wa, agod Tubun en malan lo mi tia. Tia, tamolpein malad lo dam ago migane wa.

<sup>22</sup> Agod man teima taida midini ak in dam dida dupalu da. Saen wei mi in urat fidian lo mibiti-naeg mile yak in urat igane wo ilon tubun mi yen da. In binawek kagin e agane den ilon uyanan a,

agod inſan ilo rumok aŋ o man tubun geig a. An niŋen o gamu urat en igane wo ilon tubun mi yen da.

<sup>23</sup> Aŋ Taitus alon la ya, inŋ ŋai turag, inŋ ŋai da urat naon kiſaek migane dan lo aŋ mubunawaŋ da. Maŋ teima uraru en man midaeŋ sad nao ŋilaŋal tamol, inſad urat awan lo dam inŋ girager Kristus dupani da.

<sup>24</sup> Fun an niŋen o midaeŋ fidian naod na aŋanem ilo panek kagin an akubiaip dile wa. Taida mi, maŋ gubak mi tamol en naod na aŋ yaŋam mabiſa ya. Aria, maŋſama ru aŋ niŋemi wo nuŋon ilaſa yan aŋ gamu akubiaip tamol uraru en dile wa.

## 9

*Korint adi Anut san tamolpein niŋedi wo binawek digane wa*

<sup>1</sup> ŋai binawek e Jerusalem tamolpein o atumani den niŋen ru milaen mi ta ŋigire na wa.

<sup>2</sup> Man dugo, ŋai ŋalon ak aŋ urat en agane wo tawaŋ amado da. An niŋen o ŋai Masedonia tamolpein naod na aŋ yaŋam ŋabiſa da. ŋai igo ŋurupidai, “Ananar inug ante Akaia tamolpein binawek an digane wo tawaŋ diganeg dumado na ya.” An niŋen ſaen aŋ dam binawek an agane wak ago dulon an, Masedonia wei mi ilod yabiſag inŋ dam binawek an digane wo tawaŋ dumado ya.

<sup>3</sup> Ak man ŋai teig taog ŋidinaig dupalu dan inŋ abanŋ dukubiani dile dop, an lo maŋ awama lo yaŋam mabiſa dan ru kawan igo ta dile na wa. ŋai tamol amaiak aŋ urat en agane wo tawaŋ aganeg amado dan ago ŋurupidai a. Aria, nek ibol ŋai ŋabol ago mi aŋ agane wa.



<sup>4</sup> Kabelan Masedonia aenta ηjai dadi mupalup an mala nouk ta agane na yak ago dilian dop, an lo man miai ifunama banau. Miai tubun mi an sem ipanan an ninen o, ru ta ηabol san tia ya.

<sup>5</sup> An ninen o ηjai teig muroug en ηdinaip dunug an sam na dupalu wo ago ilo sou ηigane ya. In an dibinawan pe binawek agane wo abol la yan, san melmel sisem atumani wa. An lo saen ηjai ηupalu dop man tamolpein malad ipalup an ilo uyan lom binawek agane yan dile wa. Kabelan tamolpein an man an sam filiam atumani wo mududuwan dak ago dubol banau.

<sup>6</sup> An ninen an ilo isou agane uyan. Talpein anan kabelan ipae an nunon kabelan inane wa, agod talpein anan tubun mi ipae an nunon tubun mi inane wa.

<sup>7</sup> An ninen o an fidian ilo sou agane wo uyan gup, mel dugon binawek agane man ago agane wa. Kabelan talpein ta ilon muruan anda mel igane banau. Tia, kabelan in mel igane wo disisiηanid ibol banau. Man ata wo? Anut in talpein a buben ηtun fidian lo mel ipani wo ilon yen dan ninen o imat da.

<sup>8</sup> Anut in an mel naon dugon ninen amat dan fidian ka ipanan san idaisuda ya, an lo an mel fidian idaisuda wa. An ninen o saen fidian an mel amam da amado wa, an lo urat uyan ak fidian lo binawek tubun mi an ka agane wa.

<sup>9</sup> Anut san ru girek lo ago ibol,

“Anut san talpein binawek wei mi iwae da,  
in san binawek dufurak go tamolpein filiad tia  
yan diηane ya;

injsan kagin itaotan ak pempem mi kuai tem yen yau a.”

<sup>10</sup> Anut in tamol anan ipae dan anan kubulan ipae wo ipani da, agod in dam anan taidam tamolpein diani wo ipidinai da. In iganep ananem kubulam wei mi igile wa. Ago dop lo ananem kagin itaotan an tubun geig a, nek ibol tamol anan ipaeg nunon pempem ifu dak ago mi wa.

<sup>11</sup> Anut dal fidian lo filian tubun mi ipanan a, ago dop man melmel fidian lo nek ibol Anut banin ibiseid ago mi an dam banim abisei wa. Ago dop tamolpein wei mi an sam binawek man banima lo di nane dan lo Anut ilo uyan tubun mi dupani wa.

<sup>12</sup> Man dugo, an sam binawek urat agane dan lo Anut anen tamolpein abinawai uyanan a. An mi tia ya, tia, ananem ilo munanek kagin dile dan lo ilod yabisap Anut ilo uyan tubun mi dupani wa.

<sup>13</sup> An sam binawek urat Kris adi Jerusalem na dumado dan ninedi wo agane dan lo, tamolpein an dukubianan dilian a, agop in malad ipalup an sam kagin itaot an kuai te ilasa dop dile wa. An lo in dulon ak an bilalun a Kristus ninen ibol dan anane mok a, an lo in san ru an aganuri da. An sam binawek tubun mi in lo agod tamolpein sen ak lo agane yau dan lo in Anut yan an diabisa wa.

<sup>14</sup> An ninen in ilod bubed fidian an dupanan dop an ninemi wo Anut dugudani wa. Man dugo, in dulon ak Anut san ilo panek senamo geig ak an ilom lo awan isa ya.

<sup>15</sup> Id bubed nitud lo Anut ilo uyan tupani wa, man dugo, in san lou a kawan ipanad an tubun geig a, an ninen o id tininen san tia ya.

# 10

## *Pol inſan aposel urat ninjen o targiranek ru ibol a*

<sup>1</sup> Tamol aenta ɲai ai dupanag go ago dubol, “Saen Pol id da tumado yan inſen yabi idu ya, gug saen id ibisawad go asau mi imado yan in ɲ ru dabal nam irupaiad da.” Ak gug ɲai Pol, ɲai nek ibol Kristus inſen yabi idug mos nam kulob igane ago woɲ, ɲai aɲ ru e mos nam ɲurupaian den alon uyan o ɲusumianan da.

<sup>2</sup> Saen ɲai aɲsam na ɲupalu dop, aenta aɲ lulunam lo dumado dan ru dabal nam ɲupidai o ago ɲai ilog ta yen na da. Amaiak ninjen o aɲ kagin agane wa, man dugo, ɲai tamol a in ɲai tan en san tamol sad ilo sou lo urat ɲiganed dubol dan ru dabal nam ɲurupidai dop dudu diau a. An ninjen o ɲai igo ɲurupaian da, aɲ ru naok ago ɲupanan o ɲai ta asodudunag na wa.

<sup>3</sup> Man dugo, maɲ bo tan en lo mumado mator da, ago gug man maɲ tinima tan en san bunun lo ago wagai ta migane na da.

<sup>4</sup> Man ata wo? Maɲ yu dumui nam wagai migane dan tan en san tia ya. Tia, maɲsama yu san biouɲ man Anut lo mi dabal geig a, ago dop lo maɲ ka ager sad abed dabal dabal ak murube wa.

<sup>5</sup> Maɲ tamolpein sad ilo sou mibilai dudu da. Ilo sou a sed ibiaisa dop lak na isuda yau dan lo tamolpein Anut dulon san dal dufou dan fidian murube da. Agod maɲ tamolpein sad ilo sou fidian mufutanig Kristus mi awan paen na midirai diau a.

<sup>6</sup> Maɲ aɲ malam migane da. Malan malan aɲ Kristus awan paen na amado mok tap, aɲsam awa

yabek kagin an aŋ idaisuda wa. Saen ante mi gup maŋ tamolpein awa parsisalek digane dan muruan mipidinai o tawaŋ miganeŋ mumado wa.

<sup>7</sup> Aŋ mel nek a kuai te yan mi ale da. Tamol ta aŋ luluŋam lo iŋ Kristus san tamol mok ibol tap, mel en niŋen fon ilon isou uyan a. Iŋ Kristus san ibol tap man, maŋ dam nek iŋ ibol ago mi a.

<sup>8</sup> Tubun en sen maŋ aŋ mupitiŋinaŋ o yaŋak ta ipanama na ya, tia, maŋ aŋ dabai mupanaŋ o ago igane ya. Ago dop ŋai se pitianoŋ ru an kitek tubun mi ŋiŋiŋeŋ tap, ru an niŋen o miai ta ifunag na wa.

<sup>9</sup> Dugo, ŋaisag girek e ŋigire den lo aŋ rurek ŋupanaŋ ak ago abol di? Tia mok a. Ilo sou ago agane dan ŋai ŋamoi da.

<sup>10</sup> Man dugo, tamolpein aenta igo dubol, “Pol san girek an ru dabai funfun lo igire ya, ago gug saen iŋsen ipalup id luluŋad lo ru ifulale tap, iŋsan ru an dabai aman tia ya, agod iŋsan niŋeŋ man kawan a.”

<sup>11</sup> Talpein ru ago dubol dan iŋ ilo sou ta digane uyan na da. Man dugo, saen maŋ asau mi mumado dan, kagin naok a dugo migane san niŋen maŋsama girek lo mabol dan, saen maŋ aŋ da tumado wan kagin naon kisaek an mi migane wa.

<sup>12</sup> Tamol a aŋanem leil lo yaŋad aman da yan niŋedi wo, maŋ man tamol naok ago yak tia ya. Kabelan maŋ yaŋak ago yak miŋane banau o marer da. Iŋ dag tamol tutubu boi, man dugo, sed ipitianoŋ dugo sed yaŋad diabisa da. Ak gug nek iŋsed yaŋad diabisa ago mi, maŋsema yaŋama mabisa san tia ya. Tamol naok ago yak dugo won sed ikubianoŋ di? Iŋ iŋsedi lo nug dukubianoŋ dile da, iŋ

injsedi lo dam sed tou amad diabi da. Talpein ago digane dan mañau amad tia mok a.

<sup>13</sup> Ak gug mañ tubun mi sema ipitianamap, lo tom a Anut mañ o igane yan ta mabi-riñani na wa. Tia, tom an ilon lo mi mumado yau a. Agod ansem tom a Anut igane panama yan patun fo ta amado na da, man dugo, Anut sen idiramag inñsan urat migane wo anñsam na mupalu ya.

<sup>14</sup> Anut urat awan ipanama yan anñ dam ituananñ a, an niñen saen mañ anñ luluñam lo ru mufulale yan tom a Anut ipanama yan ta mabi-riñani na ya. Tia, mañ mi malan mamug go bilaluñ uyanan a Kristus niñen ibol dan mufulale wo anñsam na mupalu ya.

<sup>15</sup> Mañ tamol aenta sad urat awan niñen o sema ta ipitianama na da. Man ata wo? Mañ mañsigama ar ilon lo mi mumado dugo mator se ya. Ago gug mañ iloma igo yen da, saen anñsam ilo rumok italbusi dan mañsama urat awan a anñ luluñam lo yen dan dam itufulak pe yau a.

<sup>16</sup> Mañ tan titin aenta anñ patum fo dien dan, ante dam bilaluñ uyanan Kristus lo yan niñen ka mabol ilasa wa. Mañ tamol sen ak san silali naon niñen o sema ta ipitianama na wa. Tia geig a.

<sup>17</sup> “Onñ talpein ta yañan wabisa wo ilo yen tap, Tubun ak mi yañan wabisa wa.”

<sup>18</sup> Man dugo, talpein a sen ipitianip sen yañan mi yabisa dan, inñ Anut malan lo man yañan tia ya. Ak gug Anut talpein ta ipitiani wo tap, aria, talpein nek an mi yañan aman da ya.

*Pol in aposel sewak dida*

<sup>1</sup> Ak dugo, ηai gidad aliafunag dop ru burau ta kitek ηabol ak i? (An ηai aliafunag on dugo ago ηigane la ya, ago yak ninen o nek ago mi ηigane yau a.)

<sup>2</sup> Anut turak isusa dan lo man, ηai an ninemi wo dam turak ηususa da. Man dugo, nek ibol ηai pein baras ta inşan iwon nien ηupani igo won, ηaiseg mi an Kristus san ak alasa wo ηipilianan a.

<sup>3</sup> ηai ilog irer da, kabelan supalek ru lo wagam mi geig mot Ewe irawi igo won, ru sewak ta an ilo burau ipanan banau. Man dugo, kabelan tamol tata an ilom diηane dop lo an ikok kagin agod rumok kagin dam a Kristus lo yen dan abiseip, ilo sou kawan ak ari apani wo man ηai ηamoi geig da.

<sup>4</sup> Man dugo, tamol ta anşam na dupalug Jesus sen ak ta san ru dufulale ya, ak gug Jesus an man Jesus e inşan ru man mufulale den ago tia ya. Agod inşad ru lo an ur naon senamo ak anane ya, gug ur an in Urgun a imug mi anane yan da kisaek mi tia ya. Taida mi, bilaluη naon senamo ak dupanan go anane ya, gug bilaluη wagam a anane yan ago tia ya. Ak dugo, saen in kagin ago digane yan, an patum apidinai ak i? Man tia ya, an kududom agureg dagom lo in awad paen na sem idiran go amado ya.

<sup>5</sup> Aposel adi nek a “aposel malan te yak” ago abol dan, ηaisag leil lo man in ηai ta dirinagan na da.

<sup>6</sup> Gidad, ηai ninen lo ta uyan na ya, ago bo man, ηaisag manau Kristus lo man ta katukan na ya. Saen fidian manşama kagin naok naok dugo migane dan lo manşama manau an mukubiaig ale se ya.

<sup>7</sup> Anj alonj ak, saen naj Anut san bilalunj uyan ak anj lulunjam lo njufulale se yan lo, naj urat naon ta njane na ya. Kagin an lo seg ibiag njadu dugo anj njiansa ya. Ak dugo, kagin ago njigane yan lo aupasek njigane yak i?

<sup>8</sup> Naj dam midaenj aenta sad moni njagam a. Dal dugo njagam ak i? Saenj naj anj lulunjam lo njumado man, midaenj aenta sad silali naon njane se ya. Naj kagin an lo gumagam urat njigane se ya. An igo ya, naj midaenj aenta injsad moni digane ipalug njane yan lo naj anj njibinawanj a.

<sup>9</sup> Saen naj melmel tiag anj lulunjam lo tumado yan, naj talpein ta anj lulunjam lo muruan ta njupani man tia ya. Man dugo, naj teig taog Masedonia dubuseig Korint na dupalu yan inj naj mel dugon lo katuk amag an lo dibinawag uyan a. Ata wo? Naj muruan njupananj o ilog ta yen na ya. Gamu njaisag ilo sou an naon kisaek en mi, murnap dam nek ago mi wa.

<sup>10</sup> Naj igo njabol, tan Akaia san titin fidian lo man, talpein ta naj urat naon ta njane na dop lo, seg yanag njabisa dan njnen njaisag dal ifutani san tia ya. Rumok nunjon, talpein ta njaisag se pitiano ru e njabol den njnen o naj awag igane itau tap man, Kristus san ru rumok an naj lo ta yen na da!

<sup>11</sup> Fun ata wo naj urat naon ta njane man tia yak i? Ata wo, anj njnem o ta njamat na di? Tia geig. Anut injsen ilonj uyan ak, naj anj njnemi wo tubun mi njamat da.

<sup>12</sup> Tamol a sed yanad diabisa dan, injsad urat an nek ibol manjsama ago dubol da. Mel an ilasa san njnen o dal abanj dile da. Ak gug naj urat naon tia yak lo ago njibinawanj dan, dal an lo inj naod njufutani

da. Agod ηai nek ago mi ηigane dop ηumado wa.

<sup>13</sup> Tamol naok an man in η aposel sewak adi, raek tinadi, agod urat tamol sewak a. Inηsad naod tinid dibileksa dibilekla dan lo tamolpein dirawai dop in η Kristus san aposel mok dubol da.

<sup>14</sup> Gug an η inηsad kagin an ninen ta arut na wa. Man dugo, Satan sen dam ago naon tinin ibileksa ibileklap in ηenel siηaokan ak lilaman lo ided dak igo woη kuai isi da.

<sup>15</sup> An ninen Satan san urat tamol inηsad naod tinid dibileksa dibilekla dop in η kagin itaot ak san urat tamol ago dubol tap, an ninen id ta tumasa saian na wa. Murna dop inηaned pani naon urat dugo digane yan atem itaot diηane wa.

*Pol mada i sini ak ninen o se pitiano i ru ibol a*

<sup>16</sup> ηai fon ηabol dak, an ηai tamol burau ta abol na wa. Gug an ηai burau tamol abol tap, gidad aliafunag dop ru burau ηabol yau a, ago dop seg yaηag kitek ka ηabisa wa.

<sup>17</sup> ηai Tubun en san ilo sou lo ninen η ta ηigane na da. Tia, ηai tamol burau ak ninin η on η go se pitiano i ru ηabol da. O kabel, ηai ηaloη ak seg yaηag ηabisa dan man ru ninen o mi a.

<sup>18</sup> Ago gug tamolpein wei mi in η tan san kagin mi diganurig ninen o sed yaηad diabisa da, ama-ia k ninen o ηai dam ago ηiganep se pitiano i ru ηurupaiaη aloη a.

<sup>19</sup> Man dugo, an η ilo uyan lo eilafu dugo burau tamol sad ru ninen o dubol da. Man ata wo? Maηau man an η Korint midaen tinim lo yen da!

<sup>20</sup> Ak dugo, talpein ta an η subanaη pe inηsan urat agane boi, tia, anηanem filiam igane itout boi, tia,



an irawan ifunan boi, tia, inſen mi yan an anda yak ibol boi, tia, kudan am igufte boi, an ago igane tap, gidad alefunip awan abol dop amado wa.

<sup>21</sup> O kabel miai ifunag da. Man dugo, kagin naok an migane san man dabai ama tia ya.

Ak man talpein ta sen ipitianip sen fun ifulale wo igane tap, nai dam se pitiano i kagin lo seg fug ka nfulale wa. Ak man gidad, nai nalon ak tamol burau igo won nini da.

<sup>22</sup> Tamolpein an Hibru i? Aria, nai dam Hibru tamol. In Isrel i? Aria, nai dam Isrel san tamol. In Abraham san gugoi lo dupalu i? Aria, nai dam inſan gugoi lo nupalu ya.

<sup>23</sup> In Kristus san urat tamol i? Aria, naisag binawek urat inſad irinani a. (An lo, rumok, nai tamol burau on nini da.) Saen wei mi nai subanek ab lo dibilag niladug dufunag malag dusue se ya. Saen wei kasik dufunag se yan maten sumeik nupani se ya. Naisag muruan a nisini se yan aposel sewak adi sad muruan naon dugo yak fidian lo nini a.

<sup>24</sup> Juda adi saen 39 nai rasau\* nam dufunag a, agod kagin naok an mi saen 5 nai tinig lo digane ya.

<sup>25</sup> Saen utol nai bu nam dufunag a. Nal kisaek pat nam dubal funag o digane se ya. Nal utol wog lo nator an wog isarir a, agog nal kisaek tidom kisaek nai beig aten fo nafot nator a.

<sup>26</sup> Saen wei mi nai panu asau mi nau se ya, ago dop you lo nisarir o nator se ya. Saen aenta gumagam tamol adi banig na biou disini wo digane se ya. Naisinag turag muroug diginiag saian o digane se ya, gob adi dam diginiag saian o digane

---

\* **11:24:** Lubum

se ya. Panu tutubun ak lo numado dop muruan nisini se ya, fon tan kawan ak lo numado dop dam muruan ago mi nisini se ya. Beig lo ndeg o sumeik se ya. Teig muroug sewak adi dam banid lo nmat o sumeik a.

<sup>27</sup> Nai urat naok funfun lo wagai mok ngane se ya. Nai saen wei mi tidom urat ngane se yan malag nion tia ya. Nai tinaeg anan tia you o nmat dop anan ta ngane uyan se na ya. Nai dog madid ate ndu dop yamel kulos ta lo tinig nutuani san dam tia ya.

<sup>28</sup> Agod nai muruan taidam tinig lo igo dilasa ya. Nai saen wei mi midaen dugo kagin npudinai uyan san ilo sou tubun mi ngane da, an lo dam muruan tubun mi ipanag on da.

<sup>29</sup> Saen Kris ta insan dabai idu tap, nai dam naisag dabai idu se ya. Talpein ta tinin lo Kris ta aupasek lo yau idu tap, talpein an ninen o nai ilog tubun mi wananan anda numado se ya.

<sup>30</sup> Aria, an nai asodudunag pe se pitiano ru nabol tap, nai ru naok igo yak nabol a. Kagin naok naok nek a nai tamol dabai ag tia yak on kuai te igane ilasa dan mi, ninedi wo seg ipitanag a.

<sup>31</sup> Anut in Jesus idsad Tubun en san Anut, agod insan Taman, in yan dam pemper tupani wa. Anut en ilon ak nai ta niraek na da.

<sup>32</sup> Damaskus na numado dugo Kin Aretas san kiap in aikatuk idinaig taun san dalawan ate idiraig dutur se ya, an lo nai diniliag pe dusubanag o tawan digane ya.

<sup>33</sup> Gug saen an nai muroug adi udou lo ditiniag go, taun an san mutunuk ta lo duyuwag go ar patun fo ndug, kiap an san ager adi nirinanaig nasol

go ηau a.

## 12

### *Anut Pol dal ikubiai pani a*

<sup>1</sup> O kabel, an ηai asodudunag dugo se pitianoι kagin ηigane yau da. Rumok, kagin naok en ibinawad san tia ya, ak gug gidad, ηaisag ηioηamin, agod ru mianuk Tubun en ikubiai ηile yan ηabol ilasa wa.

<sup>2</sup> Nai tamol ta Kristus lo imado dan ηaloη a. Tamol en ananar 14 yau la yan lo Anut inaneg, did aben a malmalan an ibiseig, tinin te yan ibiseig, aben a lak na geig ante yau a. Ak dugo, tinin aman da imado di? Tia, tinin ibisei i? An ta ηaloη na ya. Anut mi in ηiloη a.

<sup>3</sup> Agod ηai ηaloη ak Anut tamol en inaneg kumaen panu lo yau a. In tinin fidian mi yau boi, tia, ηutun mi yau boi, an ηai ta ηaloη na ya. Anut mi in ηiloη a.

<sup>4</sup> Agod tamol an kumaen panu lo ru nek a in mi kududon iloη go in mi ilon lo yen san iloη a, ru an ibol san in ta iloη na ya. Agod melmel a ninjed ta ibol o Anut ibol an dam kududon iloη a.

<sup>5</sup> Nai talpein en mi ninen o se pitianoι ru ka ηabol ilasa wa, ak gug ηaiseg ninjeg o seg ta ipitianag na wa. Tia, ηai dabai amag tia yak ninen o mi seg yanag ηabisa wa.

<sup>6</sup> Nai se pitianoι ru ηabol o ilog yen tap, ηai burau tamol tia ya, man dugo, ηai ru rumok ak mi ηabol da. Ak man ηai ago ηigane wo man ηamoi a. Man ata wo? Tamolpein in ηaisag naok naok dile wak, ηaisag ru ηufulale dan duloη ak, ago dop an lo ilo sou itaot ηai lo digane wa. Kabelan in ηai tamol senamo geig ak ago dubol banau.

*Mel ta si igo wonj Pol tinin isueg madai ipani na ya*

<sup>7</sup> Anut naj njonamin lo mel uyan uyan ak wei mi ikubiaig njile ya. Ago gug man naj mel en njile njalon an ninen seg ipitianag o man inj imoi a. Amaiak ninen o inj mel ta nek ibol si onj iganeg ipalug naj tinig lo yen dugo madai ipanag da. Mel an man Satan san urat pinein, an lo naj muruan ipanag da. Mel an naj ibiag njadu dop seg yanag njabisa njamoi o igane da.

<sup>8</sup> Saen utol Tubun en mel an ipasi yau wo njusumiani a.

<sup>9</sup> Gug inj naj igo irupaiag, “Naisag ilo panek man onj o idaisuda ya. Man dugo, naisag dabai en onj dabai ama tia yak lo itaotan ilasa da.” Fun an ninen o naj ilog uyanan dak, naj tamol dabai amag tia yak igo njumado da. Ago dop lo Kristus san dabai an mi naj lo ka yen a.

<sup>10</sup> Amaiak ninen o naj Kristus wagen lo man, gidad naj dabai amag tia yak, dububanag se yak, muruan dupanag ak, tinig dipitini ak, saian funfun lo njisida yak ago tap, naj ilo uyan lo mi njumado wa. Man dugo, saen naj tinig dabai an tia dop, ante naisag dabai tubun kasik ilasa da.

*Pol inj san ilo muruan Korint tamolpein ninjedi wo ibola*

<sup>11</sup> Naj tamol burau njinjen onj da, man dugo, ansem naj ago njinjen o agane da. Ansem mok naisag naok naok uyan an abol ilasa wa, ago gug ago agane man amoi a. Fun an ninen naj seg fug njabol ilasa ya. Rumok, naj tamol kawan a, ago gug an sam “apotel malan te yan” ta inj naj dirinag man tia ya.

<sup>12</sup> Ata mel naj an lulunjam lo numado dugo njigane na yan, inj itaot naj aposel rumok an ikubiai ale ya. Naj muruan fidian lo njatur sakar dugo njaisag urat an lo kulob girager funfun, urat dabai dabai ak an lulunjam lo njigane ilasa na ya. An mi naj Anut san urat mok njigane dan ibol ilasa ya.

<sup>13</sup> Kagin naok nek a an lulunjam lo njigane yan ago mi, midaen aenta lo dam njigane ya. Mel kisaek mi an lulunjam lo ta njigane na ya. Naj an anan ata mel taida lo binawek apanag o ta nududuwan na ya. Kagin an lo naj au njupas tap, gidad njaisag aupasek an ilom inaoj a!

<sup>14</sup> Gamu en njaisag nal utol fon anjam na njupalu da wo aban njukubune da. An ninen saen en dam naj an muruan ta njupanan na wa, man dugo, naj anjam bioun njisini wo ilog ta yen na da. Tia, naj an mi njijilian a. An alon ak nanuk inj anan o aban dilep tinad tamad ta dipidinai na da, tia, tinan taman mi inj anan o aban dilep nanuk dipidinai da.

<sup>15</sup> Naj ilo uyan lo mi njaisag mel fidian, njaiseg tinig dam, an njutum njibinawi wo njupanan a. En dugo, naj ilog bubeg fidian an njupanan tap, an ninen o an ilom bubem kitek ka naj apanag ak i?

<sup>16</sup> Gug anjam tamolpein aenta naj ninjeg igo dubol da, “Rumok, inj mel kuai te inane san tia ya, ago gug man id irawad dop mianuk lo mi mel inane san man ilon uyanan a.”

<sup>17</sup> Ak dugo, naj tamol a njidinaig anjam na dupalug dirawan dugo anjam mel disinig njaisag na dupalu yak i? Tia geig a.

<sup>18</sup> Naj Taitus ilo sou njupanig anjam na ipalu ya, ago dugo teima Kris ak ta njipilianig ida dupalu ya.

Ak dugo, Taitus irawan dugo ananem melmel igam abol di? Man tia geig a, man dugo, in njai da Ur kisaek lo mator dak, man sama turen naon kisaek ak, man sisem nug njen aban muri mau da.

<sup>19</sup> Ak dugo, an ilom lo man ru fidian e migire yen lo sema itargiranama wo migane dak ago abol di? Man ago ta migane na da. Tia, man Kristus san ak mumado da, agod man Anut malan lo ru fidian nek e mabol den man ibinawan pe atur sakar o mabol da. An man sama bubema mok.

<sup>20</sup> Nai ilog irer da. Kabelan njai an sam na nupalu dop, naisag ilo sou lo an dugo amado dop njilan o ilog ibol dan, ago ta njilan banau. Agod fon, kabelan an dam njai tamol naog dugo aliag o ilom ibol dan ago ta aliag banau. Kabelan kagin naok igo yak an lulunam lo yen banau. Nug paek kagin, turak susak kagin, tinjae saiak kagin, onse mi wo ilo sou gane san kagin, pilapil ru kagin, uf kagin, kabunja sakar kagin agod urat kubulek kagin.

<sup>21</sup> Saen njai an sam na nupalu dop Anut njai an naom na miai ipanag an njen ilog irer da. Kabelan tamolpein a gubak mi au dupas gug ilod ta dibileksa na yan, kagin saiak saiak lo, jeit kagin lo, kagin nun aman da yak lo, ditor yau na yan njen patud ta dupani banau. Nai kagin naok ago yak njile tap man, njai miai ifunag dop tinan njigane wa.

## 13

### *Pol Korint adi ru kagin irupidai a*

<sup>1</sup> Gamu naisag turen saen utol an sam na nupalu da wa. Saen an talpein ta ru apani wo dan, an imug mi tamol uraru boi, tia, tamol utol boi, in sed malad

lo talpein a muruan igane dugo dile yan anjal pe, balsinane ru dubol ilasap alon a.

<sup>2</sup> Nek ibol nai nasag turen saen uraru tinin te yan lo anjam na nupalu ante ru kagin jurupaian an igo won, gamu nai fon anjam na nupalu da wo ru naon kisaek en fon nabol da. Saen nai namul dan, tamolpein a gubak mi aupasek digane na yan, fon gamu ago mi digane yau dan, patud nupasi san tia ya. Tia, bitinaek lo nidiraip muruan tubun ak nupidinai a.

<sup>3</sup> Nai ago nigane yan lo man, Kristus nai ilog lo irupaian dugo dal ikubiai panag dan ale alon uyan mok a, man dugo, mel ta nai yanag anda yak ago ikubiai panag san ilom ibol da. Aria, kagin agane wa, saen nai anjam na nupalu wan kulob dabai anda yak nigane wan kuai tem ale wa. Kristus an lulunjam lo dabai an ta tia na ya. Tia. An lulunjam lo man in dabai geig a.

<sup>4</sup> Rumok, wagam in dabai aman tia an lo in aigim fo dubali a, ago gug in maten lo imasag gamu Anut san dabai lo mi kumaen imado da. Nek ago mi man Kristus da tinima tan en san an dabai amam tia ya, ago gug man Anut san dabai lo man in da sisem dabai amama da ya, an lo man in da mumado dop an mibinawan a.

<sup>5</sup> An ananem ilo rumok lo sem ibitinan dop alon a, an ilo rumok san dal ari uyanan boi, tia boi, an alon uyan a. An sem ikubianan dop ale wa. Jesus Kristus in an lo imado da, dugo, an ta alon na i? Kabelan saen an sem ibitinan dop man, an ta Kris mok na yan ale banau. An fun man Jesus an lo ta imado na da!

<sup>6</sup> Nai ilog yen dak man, saen man sama kulob

bitinaek lo adiri dop, anşam leil lo maşsama urat anş luluşam lo nuşon anda, an kuai te ale wa.

<sup>7</sup> Maş Anut mugudani da, ago dop man anş ibi-nawaş dop kagin saiak ta lo au adu san tia ya. Anş maş Kristus san urat tamol igo aliama wo ru igo ta mabol na da. Tia. Gidad maş urat tamol sewak ak abol a, ago gug man maşsama ilo sou tubun man anş anşanem kagin itaot ak mi agane wo mamat da.

<sup>8</sup> Man dugo, maş kagin ta lo ru rumok ak malan musue wo migane san tia ya. Tia, kagin a ru rumok ak ibalsişani san an mi maş ka migane wa.

<sup>9</sup> An nişen o anş dabai amam da amado dop maş dabai amam tia tap, an uyan a. An nişen o anş anşanem Kris kagin akubunep dabai ilasa san nişen o pempem Anut mugudani da.

<sup>10</sup> Ņai ru dabai en saen Ņai anş girişem na ta űumado na dugo űigire ya. Man dugo, saen űai anşam na űupalu dop, ru dabai nam űurupaiaş dop anşanem kagin űukubune wo ilog ta yen na da. Tubun en sen mi űai anşanem ilo rumok dabai űupani san urat awan en ipanag a, inş űai anş űibiaş adu wo urat en ta ipanag na ya.

### *Pol san ilo uyan ru*

<sup>11</sup> Teig taog, gamu űai ru wadan űufutani dugo ilo uyan ru űurupaiaş da. Anşanem kagin naok naok akubune wa. Anş űaisag ru kagin alonş uyan a. Anş ilom atumanip bubem kisaek amado, maror lo amado wa. Ago dop Anut a inş ilo panek san, maror san dam, inş anş da amado wa.

<sup>12</sup> Anş nugnug lo nug musuk gun ak apani dop nug ilo uyan apani wa.



<sup>13</sup> Anut san tamolpein fidian etna dumado den aŋ ilo uyan ru durupaian da.

<sup>14</sup> Jesus Kristus idsad Tubun en san ilo maror, Anut san ilo panek, agod ilo tumanek e Awan Urgan lo yen den aŋ da amado. Rumok.

**Anut san bilalug foun**  
**The New Testament in the Takia Language of Papua**  
**New Guinea**  
**Nupela Testamen long tokples Takia long Niugini**

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 18 Mar 2025 from source files dated 31 Aug 2023

757b3e4e-2023-5b45-893a-ee9294ddeb9d